

四庫全書

集部

欽定四庫全書

集部

祠部集卷一至三

詳校官庶吉士臣朱理

檢討臣何思鈞覆勘

總校官編修臣朱鈐

校對官庶吉士臣王朝梧

謄錄監生臣曹壽

欽定四庫全書

集部三

祠部集

別集類二 宋

提要

臣等謹案祠部集三十五卷宋強至撰至字
幾聖錢唐人官至三司戶部判官尚書祠部
郎中宋史不為立傳曾鞏序稱其為韓琦所
知常引入幕府自助今世所傳韓忠獻遺事
即至所撰其歷官本末見於集中者大約登

第後謁選得泗掾以薦令浦江東陽元城諸
邑又嘗入為京曹從韓琦辟入陝西幕府其
上河北都運元給事書所云四歷州縣三任
部屬者可以見其生平大槩至為大賢所嘉
契其才品卓有可稱而所作奏牘之文曲折
疏邇切中事情尤為有裨世用杭州志稱韓
琦出鎮時上奏及他書皆至屬稿琦乞弗散
青苗錢神宗閱之曰此必強至之文也因出

其疏以示宰臣新法幾罷是固琦之忠誠惻
怛足以感動人主而至之文章懇摯亦有以
助之集中諸體詩沈鬱頓挫氣格頗高在北
宋諸家中尤可別樹一幟觀所作送邵秀才
序稱初為鄉試舉首賦出四方皆傳誦之既
得第恥以賦見稱乃專力六經發為文章有
譽其賦者輒頸漲面赤惡其薄已是其屏斥
時好力追古人實有毅然以著作自命者宜

其根柢之深厚若此也宋史藝文志馬端臨
經籍考俱載祠部集四十卷文淵閣書目尚
著於錄其後遂湮沒不傳近時厲鶚撰宋詩
紀事僅從高似孫蟹畧方回瀛奎律髓採錄
二詩而其他均未之見今從永樂大典各韻
中裛輯編綴得詩文數百篇雖原日久佚無
由知其完闕而準計卷帙當尚存十之八九
謹分類排纂釐為三十五卷而稍倨其出處

之迹以為詮次庶知人論世者猶得考見其
崖略焉乾隆四十九年十月恭校上

總纂官臣紀昀陸錫熊臣孫士毅

總校官臣陸費輝

欽定四庫全書

卷四

提要

祠部集原序

幾聖諱至姓強氏餘杭人幾聖字也為三司戶部判官尚書祠部郎中既沒其子浚明集其遺文為四十卷屬予序幾聖少貧能自謀學為進士材拔出輩類出輒收其科其文詞大傳於時及為吏未嘗不以其間益讀書為文尤工於詩句出驚人世皆推其能然最為相國韓魏公所知魏公既罷政事鎮京兆及徙鎮相魏常引幾聖自助魏公喜為詩每合屬士大夫賓客與游多賦詩

以自見其屬而和之者幾聖獨思致逸發若不可追躡
魏公未嘗不歎得之晚也其在幕府魏公每上奏天子
以歲時慶賀候問及為書記以通四方之好幾聖為屬
藁草必聲比字屬曲當繩墨然氣質渾渾不見刻畫遠
近多稱誦之及為他文若誌銘序記策問學士大夫則
簡古典則不少貶以就俗其所長兼人如此魏公數薦
之朝廷以謂宜在館閣然未及用魏公既薨之明年幾
聖亦以疾卒幾聖之遺文在魏公幕府為最多故序亦

特反復見之覽者可推而考之也其行治官世已著於
誌幾聖之葬者故此不著元豐三年七月五日亳州樗
堂曾鞏序

欽定四庫全書

欽定四庫全書
原序

欽定四庫全書

祠部集卷一

宋 強至 撰

五言古詩

次劉才邵送魏彥成韻

國朝廣仁恩法令去煩苛三官貴持平除用不輕可矯
矯魏詳刑儒術富而夥餘事及刑書議論不偏頗能令
舞文吏無計得掀簸計其所平反陰功已堆塚神方介

以福豐獲報勤播當即趨要塗鳴玉清以儼誰云出處
間此事難預揣秋風鄉思動請郡向江左猶冀歛襟顏
已聞將轉舵想見桐州民延首候來舸置酒樂佳辰剩
插黃花朵

依韻答吳殿丞應之見寄

古人不可見空名留竹素幸而並世生千里或相去懷
賢我何勞蓄道公其富老驥伏櫪鳴使看鷲駘步浩歌
掉箒紱思極江山趣西風動遊袂撇在千巖路賦子匹

馬來邂逅一相晤既見豁所懷私心願執御論議攻不破
牢若金城固作詩遺長髯知異衆人遇

向負春遊辭以風雨開霽既久樂事未果因書百

言聊以自戲

常恨春日少况遭風雨多桃李冷不覺

按原本
缺二字

如濁河

廣陌斷游騎寂不聞行歌方其正雨時樂事空蹉跎晴
來又累朝日暖風祥和紅入桃李枝綠轉池塘波何曾
到花下把酒呼青蛾屈指九十期今已一半過繫日乏

長繩欲却無神戈
花落解笑人謂我
前言何

道旁松

何年澗底栽
移植俯官道
腹空蟻穴衆
枝瘦龍脊裏
斧斤須良材
霜雪豈終老
大有歲寒操
見盡桃李天

雷君自陝及門
謁與書偕聊成
短篇以答來貺

一官偶來泗
舉動畏謗嘲
萬事不掛齒
終日口欲膠
所學未信時
尤欲密斂色
賢者或我顧
未免談屢交
雷侯將家子
而至自陝郊
踵門貺予書
享饋煩弦匏
始見氣

頗勁既語理不散愛子欲子薦言畢徒啁啁托蔭須高
林而乃依寸茅盍行游鉅公一言變魚蛟

聞杭饑

皇祐二年

客從吾鄉來告我歲大歉百金易斗粟富者頭屢撼餓
殍相枕藉億口盡虛領客言尚未竟予淚已成點避席
駭相問予表不能掩位卑俸給薄用度抑難減是以之
官日盡室來未敢予行弟獨留居常動予懷歲凶吾產
薄慮其苦糶淡所以聞客言私懷輒興感客遽前止予

君言固足貶善自憂家為微俸誠亦忝上有天子明封
章日可剡先陳劬耕稼次述抑聚斂澄汰兵籍冗悖尚
土木儉坐使四海富寧患食不糝胡為所謀狹而復自
戚慘再拜起謝容予言愧塵玷

上知郡都官

列郡二千石所理我與共臨淮守最賢萬口交一頌彼
邦困飛蝗我境欲集鳳彼民粒不充我黍地無空去聲嚴
乎如秋霜巨猾弗得縱斷乎如蒼龜吏法不敢弄鈴齋

畫觀書朱轡春勸種明堂購衆材我公實梁棟行吐胃
中奇勲名光有宋賤生何為者碌碌備僚從天幸所與
薄半歲侍羈鞵鶯雀勢力小鵝鴈食口衆貧賤兩雖甘
漉懇輒披控朝廷重為邑外臺薦方用豈惟進寸蹠抑
可利微俸私心覲公舉如昔望郡貢媒銜士所醜未罪
已自訟公如飛一章舉族免饑凍

呈屯田

溪水日夜落稍稍露沙面經旬更不雨深處亦成澱巨

篙架空航溢若泝淺淀况乃載百指數纜安可緯念此
歸思發急踰强弩箭公如惜滯留願借長風便

送藥王圓師

吳僧甚商賈嗜利角毫芒或以醫自業利心劇虎狼今
時愚鄙人平居恡私囊寒餓來求仁一毫不肯將不幸
病且亟呼醫計倉忙惟醫所欲求萬金弗較量吳僧業
醫者十室九厚藏張口待人哺咪咪厭酒梁求其不爾
徒蕭叢揀蘭芳圓師何許人出家本衢梁自圓之先師

三世為醫王圓尤得術精一丸起膏肓雖掛吳僧籍亦
吳其衣章仁義薰厥心愈彼不願償人以財啗圓惡如
唾霑裳晨齋未有餘一餅蔬充腸行囊無長物秋風藥
裏香昨因赴人急挈然來浦陽始見已可愛氣溫語端
詳再見結所好佛外喜縑緗住久見益數乃知數事長
作詩聊紀師豈曰為行光

題婺源胡氏翛然堂

歛山碧麥差歛水綠演漾之子山水間築室傲天壤山

空鳥飛鳴水淨魚下上觀魚悟至樂聽鳥悅幽響一搏

泯悲懼萬事齊俯仰入境兩翛然無復塵區想故人石

渠英緣以命堂榜作詩羨高懷中服非外獎

孫莘老名堂且賦詩

嗟今急名人疾足投世網心撓跡固喧求得道已枉茲

理曾莫知所趨岐已兩予亦慕子徒泉石久思往何當

伴琴觴一鼓東南漿

攜印謁新守宿至德上方翌日馬上追書二十韻

攜符拜州守半舍度微徑

院距邑十五里

有僧謁道傍云我逆

邑令因徐指叢林佛宇頗嚴淨願驅大夫馬一宿總征
銓我生嗜煙蘿聞此愜幽興乃留驗僧言金碧果暉映
捨策游上方塵襟覺踈瑩山氣亂朝暮谷響答鐘磬清
風中宵來雲歛月垂鏡微吟不知旦坐席若初定遂行
登脩塗回首謝巖磴咨予秉微尚碌碌奚足競一月兩
移府未署事前
已嘗謁府未暇救民病徒為章服裹折腰損真性
予連日奔走吏事蚤出暮還君然兄數賜臨問乃
不果一見辱遺佳句謹依韻和酬

朝出雞聲新暮歸馬蹄
蒼思君不得往一飯或三輟
自從伐木興友道寢欲滅
夫子春獨勤聊解予心結

橫溪回道中作

赤雲蔽層霄早日作炎酷
解帶蔭廣廈汗發如冰世
無廣寒宮何地避蒸溽
嗟嗟尚未已里胥報甚速
云有邑頑民飲酒溢鼠腹
半酣張空拳中者致殞
踏甲令著定憲繼踵當視
覆駟車不敢緩胃暑走山
曲敵蓋無大陰託庇何踣
促因思古賢宰民鮮犯鞭
扑子賤弗下堂

政務自清肅顧予今何人為治乃不淑民既冒重辟已
亦若匍匐胡不樹善治泰然處華屋

祠僊姑回馬上作

至和歲甲午德音絕常軌寬徭且有罪外復講羣祀君
言一朝發人神共悅喜今我官浦陽距邑越十里聞有
僊姑祠獨弗識何氏按圖得本原云是黃帝女當年追
僊遊茲地倏輕舉于今數千載廟貌尚留此幾欲私謂
款吏事日勞止遽會郡符降奉行德音止以廟隸邑境

俾我即祠所詰朝叩庭下牲體已夙庀歸然重林間楹
桷極華美姑一婦人焉血食反無已丹朱雖男兒而又
作堯子生失四海位沒同若教鬼大夫不自立始信徒
為爾

久雨

雨師握天令汲汲不停駕疾驅鞭羣龍俛首隨叱咤乘
怒作霧霈不復息晝夜羲和久埋輪縮手喜閑暇山川
盛奔溢若虞歷陽化農民驗甲子其應早在夏

農民謂
甲子日

雨夏當
大旱

我疑上天漏誰能補天罅慰此農民心無使憂

早稼

寄辟疆

憶昨枉君軒始來就客邸爾僕方息肩顧我遽屈體守
閤前通名倒屣出致禮相見吐論議所學愈根柢徐為
出巨編徹若涉清濟昏膜得芟刮塵心逾易洗我亦露
狂簡君曾不訶詆于時園正花長日甕盛醴插枝必滿
頭飲醖須露底未幾踏歸鐙相將灑別涕戀戀有情照

數數辱書抵自言困道途僅能足鹽米頻吟口燥吻久
騎肉消髀首飛詩人蓬腸苦孟郊齋學舍勉棲託亭會
復傾篋黃卷樂往聖青襟列諸弟愛子乏先容何人堪
密啓努力著要策隨詔獻文陛

伯夷詩

昔紂為不道毒心無生靈四海如在鼎誰能救將烹周
武從天人戎衣舉仁兵伯夷獨何為乃諫不聽行紂徒
久厭主一朝倒戈迎天下既宗周大冊書武成夷義愈

為耻寧死弗苟生周粟惡不食雙目且餓暝紂無王者
實徒有王者名雖曰臣伐君紂德匹夫輕吁夷豈不知
意在銷姦萌

書感

擇已要有持擇人要有別淺夫脫所守柔顏附炎熱庸
兒昧所擇目前事苟悅彼柔有時變爾炎有時歇歇者
既死灰變者遂剛鐵平時綢繆地一朝等楚越古人論
淡交君子保常節作詩貽知言不為昧者說

奉和純甫秋扇

粲粲機中練作扇
圓中規
盛夏天無風
廣宇猶蒸炊
汗流既淡體
蚊齒仍毒肥
團扇當爾日
功利兩得施
一入君掌握
汗卻蚊攘披
秋風刮地來
涼氣襲空帷
功竟勢亦去
退藏乃其宜
聖人制器用
用舍各有時
弓所以在鳥
鳥盡弓胡為
蹄所以在兔
兔獲蹄何之
葛屨乃復霜刺
譏見于詩
作扇本禦暑
暑退當棄遺
奚必昧用舍
託怨班婕妤

八月十六夜與宗哲純甫翫月

結客城東樓，明月初出海。漸如水精盤，天寓無寸霽。清光如何買，厥價珠百琲。中秋一夕過，已覺人意改。冰輪縱遲遲，此夜復誰待。老蟾益自張，吐輝增十倍。把酒共月語，世態何足罪。自有昭昭暉，千古萬古在。

冬日偶書呈縣學李君擇之

北風吹嚴雪，草木無媚姿。野田一穗盡，雀鼠猶苦饑。浦陽際窮山，不與陰冬宜。今我雖旅宦，一身十口隨。有酒

奉親壽呼妻伴兒嬉幽腸尚多感悄結對此時念子客
千里形影外更誰空齋抱吟膝敵案覆飲卮我本依賴
少校子反有餘何日富貴塗引子並足馳朝得位夔契
暮致君軒羲收身結嘉客量金買妖姬人間有閑愁安
能到雙眉

送純甫仙尉

秋晚送歸客別酒風前酣一揖不回歸撇然就征驂挽
裾問客故捨我何其甘客言有慈母三歲淮之南今將

拜嘉慶歸心劇風帆薄親厚他人倒置理豈堪顧予失
所問汗顏為客慙客生富豪家妙年穿青衫初仕已絕
足不與羣鴛參掾邑尚牽制逸驥受轡銜縱之使自馳
萬里日可貪持此作親壽行矣母少淹

將別純甫四十字奉呈

我馬將北馳子車亦南挽車馬無留行相去即相遠風
林秋聲乾落日孤峰晚後會未可知莫使別觴淺

將有東陽之行宗哲為具話別以詩見招因答來

賦

秋高山城幽風動林葉吼百感從中來將分故人手故
人惜輕別樽酒欲相厚未飲已頽然別恨濃於酒

別筠陽

憶初來筠陽風土習未穩家人畏山氣一日或數飯愁
來數去期三載若天遠居之既累月吏事頗云簡山水
慣可觀雞羸肥堪饌却愁解印紋奪此養疎懶觴詠趣
滋適不覺滿銓限門前迎新官槌鼓開田阪顧予謝鄧

侯寧有邑人挽水聲與山光念此違耳眼

寄純甫

相從浦陽官三十月盈缺出必並轡游居常對案啜子
褊子能恕子短子還許久而見交心中不容間舌

問問
之問

乃於窮秋時忽作遠道別別腸如亂絲一寸知幾結別
語如悲笳一聲凡數咽咽極繼以號旁顧亦慘切匹馬
獨來歸山城雨初歇

依韻答貫中見貽

魚蝦泳大海龍困汚池埋鸞鳳氣塞吭百鳥鳴其啾猶
吾呂夫子短褐包壯懷舉腳踏青雲失勢寸步乖却視
後來輩厭已猶積柴否屯豈我獨升泰奚人皆一別春
四歸聚首邈不諧前日忽踵門謁與行李偕相迎把交
臂似合已擘釵于時節清明花淨無纖霾共引不筭觴
傾瀉猶長淮歌詩互挑戰舒慘出百骸愁吟慘春暉樂
詠舒寒菱男兒萬里心無作伏櫪馮天王下科詔羅俊
基泰階盍行取好官一為光同儕

野園移植小松

平生歲寒心頗好歲寒色一松如人長慘淡窮山側樵
兒日過之有意斧斤得予心異爾意野園為移植醉聽
疎聲眠吟到細陰息落落巖澗姿相對永朝夕如言千
載後其長可千尺人生雖百年相期眇無極且結無情
游汝固予何易豈待百年外人松兩殊迹人為松下土
松化土上石我生始踰壯足以伴寒碧

公立煎茶之絕品以待諸友退皆作詩因附衆篇

之末

造化于草木所與有薄厚茶生天地間建溪獨為首南
土衆富兒一餅千金售公立須南官好林去居衆富石俸
錢未到門已入園夫手買藏惟恐遲秘之逾瓊玖前日
發箱篋出以奉賓友蒼玉碾底碎浮雲盃面走一飲睡
廢甌空腸作雷吼茶品衆所知茶德予能剖烹須清冷
泉性若不容垢味回始有甘苦言驗終久吁茶特不幸
而出三代後不及餘草木盡掛詩人口禹貢籍九州瑣

細登橘柚古若有此茶商紂不酣酒

范鉞進士遺樓徹司馬庭石以質交樓作詩美之

因邀某同作

樓君仕塗傑范子儒林選論文二人者誠至不以勉范也車將西樓也酒以餞胡然膠漆地猶假外物顯范子庭前石千年立蒼蘚移入樓君圃重可載十輦堅以示固交此意豈云淺怪不涉剜刻險不至崖巖坦然久要情無向石間辯其堅竟有泐其重尚可轉不若照以心

兩確乃吾善永結忘形游嵌巖君勿羨

和施耕進士憶竹

夫子卧古屋趣敵巖谷深六籍環一身口誦頭不簪瘦
碧久去眼寂寞清風心朝思蔭之醉暮思繞以吟秋空
碧新弄無處停幽禽安得青玉枝來作半畝陰終朝對
几榻歲寒結知音於焉傲富貴追蹤晉賢林

京華對雪

嘉祐歲庚子長安一尺雪落地還成冰后上凍欲裂出

門望天街層城裹銀闕健馬載高冠傍人指夔高拜表
瑤墀歸酒面風前熱萬井莫回頭窮閭正騷屑曉突無
青煙饑唇闕殭古咄嗟路邊子未死衣百結亦有待次
人空囊磨歲月愁吟徒爾為泐泐天地闊

與任道及順久二師賦小閣見月

醉領玉川子夜八支公院危閣邀共登身在霜空半缺
月穿雲來塵區未應見長飈蕩寸靄天宇痕無線坐久
吹青燈寒光可對而飄颻釋苑秀洒落儒林彥相逢愛

清景險語寫幽玩野令才素慳斗為吟毫健詩成萬象
索孤影轉樓殿遊屨絕出門高僧應作伴

誠言

君子言欲艱出口終身俱衆人易由言朝出暮已渝言
之于一身譬若戶藉樞爾樞苟不慎彼戶將誰扶不重
一語言是輕六尺軀忘言要有成不成陷半塗耻言在
克悛不悛行卒汚今吾觀衆人一言異朝脯爾志既可
見爾耻復若無行將小人歸嗚呼爾非夫

祠部集卷一

欽定四庫全書

祠部集卷二

宋 強至 撰

五言古詩

賀陳右司生辰

悠悠大塊間萬類紛相敵偉哉拔俗人真宰豈無力六
經陷邪說釋儒共一律天未喪斯文公生抱絕識著書
羅古今射策開膏臆前輩幾欲盡後來昧所適天將激

顏波公生秉孤直數諫難居中三已無愠色海宇屬無
虞天工或曠職天保佑皇帝公生蘊竒德培擁棟梁姿
一旦壯王國禁網雖小寬疲俗未全逸惟天念我民公
生富才術發揚雲雨勢諸方待膏澤天既責公深眉壽
夫何惜行看佩相印不羨登仙籍南山雅望重北斗威
聲赫稟生固難朽吐納自不息惟昔軒冕徒尤喜山林
跡留侯追赤松志就亦何益傳說為列星但已脫寰域
孰如我公貴與國長無極

送張升甫三十韻

歲餘客秦雍處俗失大方眼前紛朋游外同異中腸最
得張子晚一見合柔剛拜我十年兄本非以其長直緣
父兄舊及此三紀強子之先大夫疇昔倅餘杭予時以
童子進謁升公堂仲兄齒予亞同學隸州庠行聯坐接
席無異彼雁行此時君尚孩縱記今亦忘去住忽南北
中間異行藏後予與君兄鄉貢入帝鄉見面初驚疑偕
問徐乃詳同年忝進士茲復同省郎伊予論契好始見

今髮蒼昨君解下却東去隨薦章歸來婦翁家春風到
秋霜子居幸對舍有酒呼隔牆往還興頗熟間外絕毫
芒乘月步橫橋觀漁立回塘詩句迭唱酬稍稍積巾箱
自許先功名知我尚激昂故言遺形骸不以我為狂古
稱管鮑交千載竊相望辭我復云東坐不安吾床汴水
日向落更久不可航甬東拋田園不治久欲荒急省江
南兄數事皆不遑慙慙挽征袖強留盡一觴何以將別
意時菊有清香

送吳令常甫之武平

朝廷重一邑悼昔容備員自嚴薦舉法頗號近得賢仕
者既擇地主恩那罄宣遐封豎惡壤十必九棄捐武平
杳何所閩裔天南偏林密毒虺藏吐瘴蝮長煙冬候氣
亦暖里俗衣不綿舊冬昨請代闕榜張三銓無人議一
往常甫獨不然丈夫志四海豈安廬室邊畏避屬衰怯
我今幸壯年所寄有民社勇去無山川吳天破新臘雪
片衝離筵闔坐勸別盃情厚禱亦虔藥餌慎勿疎善保

食與眠拖牙起驚濤餞車散江壩吏民前途奔爭迎上
龍船到脩府中謁首低小侯前主人知才名應以塵土
憐下車轉春首訟未臨婚田遠人喜新君有訴恐不先
據案掃滯務一決如流泉呼兒伴兒戲邑事樂靜便地
寬人物稀林實雜海鮮荔子委樹旁毛魚不論錢飲食
信云美那肯事宴筵改休寧閑齋空腸味陳編他人保
無過歲滿猶自遣矧君資性好進業補未全材長老松
榦氣強直弩弦坐養青雲資歸着要路鞭君家新蔡後

清節能世傳豈必因賞格薦狀期聯翩鄙人忝末契相
識由童顛憂懷自足感况復別緒纏君其慰我私北鴻

附新篇

曾元恕累日不相見以詩垂寄依韻和答

丈夫收功名要在少壯時今予四十強才短良時遺俯
首入掾曹所託真一枝動靜繫他人何異馬受縻事業
乖聖賢饑寒愧妻兒浩歌望青雲致身分已遲江湖久
去眼終日懷釣絲元恕知我深愛惡非衆隨憐我事冗

宦役役猶兒嬉十日不一見敢以奔走辭與子結永好
交情保無移相從文酒歡晚歲滄洲期

走筆成一篇答徐君先輩見寄

定交初何年昔齒會稽學君壯我尚少道復先我覺子
時于衆人百鳥一驚驚學官程諸生題品或義卓衆方
縮手顧君筆已一捉落紙千餘言渾如金出璞辭場或
鼓行無敢犯鋒稍有時談遺經聖賢在口角憤疾異說
妄摘扶三傳駁語氣清不休旱天冽雷電南北俄乖張

同時去師幄未幾會京國君羽正濯濯以文試有司好
古拙雕琢一失太常第聞子繼屯剝翠鍛累在毛龜剔
鑿由殼古人亦憂患千載名愈卓子雖綴小官夙志負
山嶽簿領但戕性祿粟不周啄再命作陋邑舉動尤齷
齷旋巢子何所距我幸非邈寄詩冬為期當遂笑一握
待將得喪理同付尊酒濁

送元恕

我本生窮闔才命兩乖塞再試得一第失足落銓格去

年赴選集摩肩雜隸役吏口駢名呼推沮氣填臆僦居
在閑坊門巷少人迹于時苦病吟誰肯顧越寫高冠縱
一臨車馬有屈色平生青雲志帖帖若墜翼羨君富詞
才時志復兩得解褐拜初命便綴審官籍秋高馬足健
駕言往京國諸父列禁嚴南北羅第宅往來伯叔間此
行穩棲息君家世儒林國史況山積燈火今可親幽探
勉餘力京都號紛華君志定非溺勿貽雙親念此外慎
眠食

早行澠池道中

二年別咸秦八月過崕澠碎石隱地起險塗抱山轉我
馬無完蹄我僕有重趼林紅烈炬暴澗白亂流淺夙駕
露濕衣夕休獨臨饌轍迹環九州孔子未能免咨予獨
何人安坐顏輒覩區區適其宜誓將策疲軟

乙巳十月七日過黃河中流遇巨浪偶作

清旦絕大河拍隄滾黃沙巨舟忽搖簸心悸眼亦花咨
子豈輕生將身試魚蝦忠信固所憑此理懼或差定息

神魂寧歸心眇天涯故鄉念昔游湖面貼碧紗醉舫穿
芰荷坦腹如眠家天水自照映鷗鷺相交加雖無風波
憂齷齪未足誇豈如尋河源安穩浮靈槎脱略遺近觀
飄飄薄飛霞低頭顧濁流卑險吾汝嗟

過潼關

巨方信天開嵒岷土山口豈惟控內外勢不漏飛走一
夫或當關可敵萬夫守山河此襟帶怙險聖所否明皇
晚倦勤意恃太平久絕艷荒真妃轉盼六宮醜祿山假

天性恩豢不知厚鐵騎長驅來哥舒苦徒手吾君暢道
德四海一父母人心自固結茲關復何有

苦雨

關輔連歲旱耕地千里赤官家放租稅猶有道邊瘠羣
國乞膏雨童巫叫蜥蜴神聽久寂寞民意轉淒惻天公
忽瞑目一怒乖龍殛雨師偃其旁驚起振厥職不復計

多寡傾瀉信朝夕入地知幾犁

陝人以犁測雨之深淺

地上但盈

尺洶如三峡注那辨四簷滴落勢曾未停廬井反憂溺

始知天公難不易人願適舉頭告風伯速吹濕雲坼却
還秋日光迤邐照阡陌俾民布新種來歲飽麩麥

幕中偶書

劉侯驅車東幕府賓客稀凭几獨蕭然真與萬事違巢
燕無世情閑堂時一歸東風忽怒號輒來撼窻扉攪我
靜中趨聒聒無停威塵沙亦侵人猶喜勢力微日暮風
稍息出戶聊振衣行吟視庭木枝空但花飛幽思感晚
春浩歌送斜暉翟公大書門怨激恐已非俗物喜去眼

杜子吾庶幾

徙居

人生如寄客况復真客官南舟與北車來往若征雁殘

暑赴西雍冉冉忽秋宴三徙乃定居

始至寓法掾廳又徙倅廳又徙書記

廳遂安居

什物旋營辦騰移費負挈猶恐僕夫訛幕府文書

稀食息有餘間短才乏所補公給浪蒙恭懼辜主人恩

從事不敢慢南軒有佳趣流渠瀉幽澗潺湲無時休弄

水悅童邕關中氣候晚時菊始云綻亦有終南雲朝暮

生顧盼浩歌一樽酒常分任鵬鷃

幕中書懷

宦游老歲月春花漸空枝坐耗鏡中顏日饒鬢邊絲
流俗宜重輕青雲勢參差剛腸寡所合出門復何之
趨向於今乖考古聊自怡黃卷有聖賢目覽心與期
君子顧萬世小人較一時不見九原骨貴賤共狐狸
惟有賢愚名縱久亦兩岐退之賦二鳥無乃為物移
信已一推天孟子真吾師得喪付濁醪身外非所知

九日與諸君飲

寒暑當遞遷 日月會陽九
綠鬢驚秋風 黃花泛樽酒
行樂重此辰 登高命諸友
古人感塵世 宜開笑歌口

送粹中赴舉

朔風攪疎林 短日寒無暉
有客氣軒昂 束書赴禮闈
行橐雖云輕 滿抱藏珠璣
出以售春官 善價其可希
骨肉送出門 稚子猶牽衣
我為舉別觴 一言庶不違
京師足紛華 慎勿事輕肥
白首有雙親 待子得官歸

石九之出銅雀臺硯相示信筆題其後

銅臺遺荒基寂寞千載下黃埃朽壤間所得或片瓦硯
材世共珍購金不論把浪好昧所別往往亂真假

聞毀

憶初向關中觸熱事西走淋漓汗征衣早夜犯星斗
驢然赴所知辛苦復何有主人喜賓至相見勞杯酒誓將
劬毫髮聊以塞所厚遇事因輒言何嘗計從否平生性
坦率間或忤交友是非長安城側身避讒口彼姦乘其

前吾慮亦已後二叔誣周公三人惑曾母青蠅亂黑白
視潔以為垢聖賢且不免予免焉能苟浩歌動歸歟至
此信不偶春風憶東南巖花映溪柳南山有屋廬釀熟
喚鄰叟何時理扁舟舊物入吾手回頭謝信信投北汝
誰受

壬子歲旱

熙寧歲壬子春旱初可怪不雨訖夏尾天地一爐鞴赤
日裂厚土黃埃沒經界農夫望雲霓折意未懈侍中

守北門撫俗先罷瘵閔雨憂更深徧禱劇齋戒老宮與
佛廟三日一往拜冠者厭於呪褐者勞於咽雨應絕不
聞煩鬱何由快憑誰訴天公請執乖龍械

予初春被病中夏少間勉入省局偶成二十二韻
東風吹春來移疾聊少休寒熱戰予軀漸如錯春秋侵
尋日以劇謁告牒屢投性命吾自安所負空食羞交親
每問訊愛者或見憂伏枕數晦朔忽忽月四周有叟肆
囁嚅吐哉我何尤騰口狀予疾張大實頗浮背憎說休

咎唯恐予疾瘳寧獨冀術勝仍欲悅予仇叟乎汝何愚
天命非爾謀生死籍素定理莫移恩離身世如寄客日
月速置郵引照盍自傲霜雪滿汝頭胡然不知止脅肩
謠貴游干進苟朝暮利吻銛戈予予今偶不死官意滋
悠悠卻來坐省局心跡逾林丘北扉對新篁陰薄榦已
脩薰風送瀟灑不博千戶侯富貴功名間有待終無求
鸞鳳志寥廓燕雀徒啾啾

某蒙君章兄寵示櫻桃佳篇輒依韻奉和

炎蒸有正色下與地氣闕相結成舍桃使冠百果班獨
憂赤日曝坐變紅成殷多應絳闕種上聲流落來塵寰金
盤瀉不定四走如循環睡龍失火齊領空皆血潛以口

比樊素白傅誇嬌鬟卻嗟荔子陋遠在炎荒山每歲貢
天子險路勞緣坂豈如盛京洛地廣生不慳朝須暮可

進先御後匪頌離樹既不久弗改猶童顏嗟嗟唐中宗

游樂芳林閑

芳林園名

君臣失儀度口摘省手攀不聞薦先

廟書在史冊間愈藉爭詩豪勁句嘗往還予知青冥賜

難到山溪灣

韓退之和張水部敕賜櫻桃詩有傳賜出青冥之句

林園幸自有圓

顆赫不黜雖熱豈厭食縱密寧忍刪况此鮮嫩質非並

青梅頽

羣牧司雨中池上作

累朝困炎威一雨轉愁意偶看碧蘆叢宛在滄州地岸
草閑自滋庭葉紛以墜移床就幽窻簷溜聒清睡

送章傳道東歸三十八韻

一日或數篇數日或一軸夫子之於詩夜補晝不足長

吟天地間萬象困題目天徒飽其才而特餒其腹聲名
三十載半百事場屋今年試春官淡榜輒不錄東風吹
殘花客淚迸京轂回頭謝青雲却抱來時玉河陽謁相
公每見輟飯沐盥金寶空囊禮遇駭僮僕遂游西諸侯
騎馬度函谷長安尋素交零落半丘木惟有終南山相
看似舊綠東李雅好客既親意轉篤授館如投家晨杯
繼宵燭羸馬殘青芻饑僮厭餘肉子方坐幕府隘嫉苦
流俗羣吠耳且盈介立趣頗獨得君倍歡然坦不置邊

幅論情雖云晚聞誼固已夙二章初交鋒懦氣令避縮
自笑不量力強和旋取衄從此遺形骸留饌或脫粟有
酒時招邀共醉小軒竹論議到聖賢道德富停蓄豈比
篇章流烟雲繞心曲飄飄走邊城新禁察儒服戎帥不
敢延進退勢俱觸六月汗霑衣幾作窮途哭回來卧旅
舍所得不克欲鄉思生秋蛩輕裝遽云促行當買淮田
晚歲謀退築子材覺無庸計慮亦既熟無資媚要權與
世背馳逐祇合從漁樵胡為苟寸祿淮吳幸相望有隣

可容卜浩歌老吾生爭食任雞鶩薄宦猶縻人歸飛羨
黃鵠

予以病久不赴朝謁因灸三里穴罷信筆偶書

竊祿了無補卧疴慙有日空聽朝雞鳴阻挂朝衣出啓
處不自安灼艾加諸膝庶幾起沈疴犬馬委微質

立秋後病作此寫懷

卧病喜秋至昏煩庶以平清風不少濟宿疾仍相櫻涼
葉猶未振陰蛩已先鳴四時順萬物奚獨戕吾生

入山謁怡然上人因成短篇皆書即時事

行穿六松陰鳥語逢人寂林僧洗山鉢正了寒堂食揖

我喜滿顏吟窻半軒闢鳳凰名山不無情天外送佳色春

風動花雨枝上或涓滴羨師得安住我亦有閑適出門

懶鞍馬把袂步幽石石盡浮泥深恰恰露雙屐臨別心

徘徊野店更一息

僧副普濟過予詰其師名僧職之所自則曰嘗濟

活饑民百萬朝廷論酬以得之欽嘆不足繼以詩

云

佛子葦麻衆槩能蠶食人庸奴買師名納貲不計緡普
濟釋苑秀類同行佛均往歲東陽饑愁聲聒蒼旻天民
坐欲死誰肯發一圉師勇營饘糜全活百萬民外臺上
其事朝廷嘉師仁相府議優賞美號寵厥身汝往貳爾
正示勸出聖神今時士大夫體雖具纓紳十九飽妻孥
何暇及困貧視師固有激抑可警其倫

墨蟹

瑣瑣江湖中忽在幽人壁
短螯利雙鉞長跪生六戟
骨眼驚自然熟視審精墨
初疑螾穴束猶帶浮泥黑
橫行竟何從躁心固已息
終朝牆壁間頗有肥霜色
我來空持杯左手莫汝食
誰奪造化功生成歸筆力

祠部集卷二

欽定四庫全書

祠部集卷三

宋 強至 撰

七言古詩

棲雲閣

越山東南號勝絕古寺巖洞窮高深山雲出為洞口雨
或時散作巖下陰不有神物此蟠據安得氣類長相尋
寺僧愛雲恐雲遠置閣雲上躡以臨豈惟憂懷獨舒悅

更許遊客開塵襟客來祇知寓暫賞不道歸去還塵侵
寧如僧住得安穩終日自共雲無心

陸君置酒為予唱陽關即席有作

陽關何處草烟平不識陽關空記名古人驅車欲西過
吟成繕寫離羣情天涯此去故人絕雖有樽酒同誰傾
古人幽怨幾時盡至今愁殺陽關聲陸君酒酣喜自唱
坐上客淚俄縱橫杯盤咫尺意萬里忽若身在關山行
耳傍宛聞車馬動簾外已覺邊風生乃知樽酒須故舊

為君一飲無餘觥

結交行

貴友高車照簪組富友黃金輕糞土二友方論富貴交
以漆傾膠入心腑一朝金盡囊無餘門前不見簪組車
貴人今車底似昔早失黃金舊時客由來結交要勢均
一輕一重難為人滔滔世上耳餘輩寂寥管鮑今埃塵
交情以勢不以義今日雖同明日異君子結交自有持
賤貧富貴不我移

依韻和李評文思

我心炯炯君應識萬事都慵獨吟癖二年客眼看京華
可見無媒進無益勢門所喜在佞豪直語空拳無一憚
愛君挺拔生貴家不學庸兒醉朱碧兩提試筆賦翰林
落落金聲天上擲改丞殿省頭不回直把羣經重研捭
相逢憐我猶滯濡四十金闈未通籍勢門宜不容此身
賴有君家好投跡書齋延坐開新編光焰文章追祖白
更邀詩社同襟期脫略形骸一疏戚公侯必復君勿避

志士由來輕尺璧

贈賈麟

賈君貌古文章老虬髯鋪胸犀插腦戲誇才力驚眾人
談笑千篇筆端掃酒酣座上披天真剗去厓岸露懷抱
今年禮部更新書續詔九州登俊造宿儒晚秀趨術茫
肝愁胃苦搜辭藻獨君所向異爾為長袖陂陀踏幽草
君近遊行窮兩徑躋巖巔指點晴江辨秋島却騎匹馬
徑山歸湖山古寺相逢情愈好空罇無物醉故人輒出囊錢

具梨棗更長坐久然青燈語雜譏諧欲顛倒我方正色
起問君何乃終年事枯槁齒牙未豁才有餘一賦從容
成腹藁琢磨高論馳古今足歷天衢騁王道駕羣沓沓
猶爭先驥駉胡然甘伏阜君徒俛首不我答我反慙顏
汗如滌丈夫貴富難近窺一第定非論晚早豈同祖誼
名漢朝位不公卿身已夭何時却掛吳淞帆霜蟬初肥
恰新稻

前日以詩贈賈麟進士繼蒙和答而楊蟠從事亦

隨次元韻鄙思不休輒復自和二篇

賈生俊辯凌諸老二十漢廷冠挿腦魁竒達喬空傳家
慘淡壯年翻却掃巧心用過金幾緡憤淚頃乾玉三抱
五湖夢數歸何時四海形單生不造鄉宴無心聽鹿鳴
時平有口歌魚藻每舒意氣拂劍光懶把窮通叩著草
江河飲肺吞阮劉風月吟腸笑郊島君才慎勿恃晚成
俗態由來尊少好衆人競進皆揜苗獨子甘貧猶嗜棗
囊裝未抵一羽輕筆力堪支泰山倒閑身自放壠上耕

愁面誰憐澤邊稿幽尋騎馬衫覆鷲冷臥乏羶床露藁
無勞兒女憫滯材豈竟乾坤厄吾道從前平步封公侯
亦有逢辰出與阜光華聖旦髮可晞涵泳儒流身已澡
收還事業幸未遲揖取功名須及早不然一世成虛生
雖曰百年如實天公朝富貴弗汝愜仕路高車似麻稻

其二

愛君氣幹霜松老一見相投許肝腦豈同世上秋葉交
不及歲寒如電掃有才無命三十強寂寞吟齋膝長抱

愁來徧踏公卿門，綻褐不縫誰改造。文章直吐元化胚，
天樸豈須施斧藻。長篇下筆縱立成一字，未曾傷草草。
辭源奔注吞衆人，有似驚潮沒孤島。善君取友論片能，
不學常情求百好。琢磨六藝相與游，我愧性靈昏椹棗。
平湖綠淨時招邀，爛熳清尊為君倒。客塗見月凡幾圓，
勸馬聲飢奴色槁。路傍甲第欺儒冠，奴厭腥肥馬餘藁。
我疑造物偏膏梁，富貴何緣性有道。貫縻巨室君空囊，
朱紫摩肩君衣阜。大鵬寧合安尋常，怒翼天池終刷澡。

功名豈必收目前兩鬢未銀猶得早顏彭骨朽千萬年
漫與後人論壽夭君其努力攀青雲盛醉春風釀香稻

題惟晤師斑竹杖

蜀江濯錦含文漪竹生江岸初綠滋錦波一浸入竹肌
萬洗不落斑在皮又聞淚點灑舜妃遺跡漸染傳今時
搯不受爪滑可持隱起高節無屈歌江神雖寶莫自私
煙根忽逐霜刃離截而為杖得者誰龐眉大士今一枝
編爛頗與壞衲宜朝躋山巔暮江湄山備兕虎江蛟螭

爾杖未折莫汝危足力自健無險巖安用童子兩肩為
當年常竹紋無竒猶託變化神葛陂况此已是斑龍兒
長恐一旦風雲隨復整頭角還天遠未必久為師有之

和禮之喜雪十二韻

水官司冬不舉職天地當凜氣輒溫頑風伺隙倒天令
掃蕩不使繁雲屯陰崖邃谷殆窮臘空有雪意乘朝昏
宿荻老柁亦借便欲洩陽氣芽株根往往百怪竊窺視
思以沴疫傷羣元賴吾太守為民切百拜默與上帝言

臣因視民間農計亟雪猶可望有年知民所欲弗帝告
安用備位稱守藩至誠一發動天聽霄垠地堦俄瓊璫
混然上下共一色直疑元氣猶胚渾狂風埋藏反失勢
却授威柄還水官既去豐年在冬雪豫擬癡腹盈朝餐

送關景芬祕書赴山陽尉

莪冠初上童兒首君已老成予輒友肺肝相照二十年
今日不殊前日厚紛紛共笑薄媚徒對面論心回面否
吁君意氣非昔羸猶著青衫從吏部得官將尉古山陽

有蘊無施州縣後山陽楚邑為最雄聒聒衆咻千萬口
階庭聽命趨上官守閣使臺鞞日走舟車冗客來百須
政逐從違成好醜君才遇事有卷舒公道當官膽如斗
或時畏縮類懦夫私請不容毫髮受往行素守裨長官
肯到縣廳同木偶頗聞彼俗殊東南例重市門輕隴畝
鹽商茗販白刃隨切與椎埋破淵藪能聲自可博已知
懶赴庸兒媒左右吳江日暮山川愁疎樹烟頭排敝帚
北帆欲掛傾別觴還有陰風吹散酒醒難為別醉幾何

人世無時好分手知君此去忘故園淮月楚雲惟我有

送吳判官

雨乾青活淮上山君領善課趨帝闕春風滿路馬足健
翩然征轡不可攀吁君登科越一紀中又困躓罹苦艱
蒼虬垂髯猛虎臥青衫四十鬢欲斑我疑君胸典籍府
千軸萬卷羅其間聖經賢史及怪說叩之不已如循環
有時啓口論時病往往憤發涕欲潛位卑道屈志未就
姑以大筆誅雄姦就令君居太史局猶足上下馬與班

剛然古膽貫白日不為權貴柔正顏退之常患天地惠
偏向君子懷獨慳高冠大笏盡知己行矣得意東南還

贈徐君強

浦陽窮僻山縈迴徐子匹馬窮山來十年不見安否外
怪子面黝身紅埃自言壯圖醉無幾獨有古膽剛不摧
日于篇章遣孤憤袖出巨軸為我開密行細書幾千字
一一紙上皆瓊瑰渾然天成有警句直若未剖元氣胚
間工磨琢弄纖巧真宰手犯天葩裁詩人古亦少達者

非特徐子如寒灰孟郊老獨張籍瞽李杜落魄皆何哉
別挾幽秘奪造化雖甚寒餓天弗哀又疑才命不俱得
既奪之命止與才子今所往但逢蹇絆驥兩足猶駑駘
浦陽山深尚春淺桃李纔藥花正梅子時過我值詒簡
花下一飲將百杯酒酣慷慨起勸子更厲頭角需風雷
縱令不偶竟窮死猶愈空腹冠崔嵬

邑舍東池近日荷花盛開輒書短篇奉邀宗哲純

甫二同寮

前時乘暇到池上荷花未開荷葉小彌旬風雨隔追當
期會簿領復煩擾今朝始得臨舊隄花開已繁葉將老
古人最謂行樂急癡兒漫欲官事了錢揚與我近同趣
一樽今待共君倒聯鑣且來趁花飲莫待紅稀并綠槁

七夕

七月七日暑氣徂此夕何夕樂且娛世傳牽牛會織女
雨洗雲路迎霞車初因烏鵲致語錯經歲一會成闊踈
牛女怒鵲置諸罪拔毛髡腦如鉗奴星精會合不可詰

我疑此說終誕虛又言星能遺人巧羅列瓜果當庭除
綵絲貫針望星拜夜深乞巧勞僮愚吾聞撲散形器作
人奪天巧天無餘匠心女手剝淫巧工與造化分錙銖
薦紳大夫一巧宦坐取公相如指呼間乘巧言惑主聽
能改茶檠成甘腴織辭麗曲騁文巧宛刻聖道無完塗
星如有巧更可乞益恐薄俗難持扶我願星精遺人拙
一變風化猶古初

題蘊忠上人歛硯

山僧有硯名龍尾此石來從歙溪水通明直可照髮毛
瑩滑不容安手指案上長疑片月生匣中自有浮雲起
蒼然顏色涵秋波不學端州誇嫩紫溪匠琢為寒瓦形
如從銅雀初飄零只仍故狀不復改獨有亂點生繁星
高閑上人妙書劄什襲藏來時一發拂開輕霧磨烟煤
揮灑霜毫冰紙滑咄嗟此硯何為哉世上別有潤色材
胡不往焉與徘徊日濡大筆把詔裁無久滯此空塵埃

通判國博中齋詩

天下以中為大本天地得中能自生古之聖賢一用中
政刑禮樂萬事平於戲後世中道喪政分寬猛刑重輕
禮非儉陋則奢僭樂不專一須銜鏗其間萬事亦頗僻
或過不及誰與繩今公奮然力追救大署中字為齋名
謂中之迹不可見祭馬其道存六經尚書洪範有皇極
春秋王道為權衡在易之又貴二五于詩無邪義甚明
子思著篇究根柢王通命說垂儀刑夜探羣書味中理
雞鳴而作還奉行出處語默皆時中指諸萬事無例傾

有時賓至相與樂詠歌亦作中和聲簷前竹樹有中色
四序不改長青青公今一州貳守政千里猶變中庸毗
異時朝廷贊天子擴之四海中道成至得攝齊升公齋
一聽中論退服膺

還府推揚學士無為編

蜀山秀色參天起子雲文章摩玉壘闕右衣冠從古名
伯起光華擅楊氏後來氣象幾寂寥今日西州聞學士
吁雄述作擬聖人蹭蹬三朝官不徙震雖有時無雄文

而又晚齡纔得仕豈知學士丁妙年一日青雲趨萬里
高才大筆驅古今奄有震雄兼二美布衣平昔抱經綸
浩蕩著書窮日晷幽居獨占無為山因以名編仍號子

學士既以無為名
編復自號無為子

鑿開元氣爭化工別出微情泣山鬼

先儒浮妄遭芟鋤直與六經相表裏青衫冗掾錯致身
四十摩肩雜胥史日趨官府舊學荒已分清流將絕齒
前時輒辱授此編如以威韶震聾耳夜侵燈燭盡廢餐
若涉江河徐見涖乃知無為非不為道化自行而已矣

立朝本此足有施堯舜吾君那出是天球豈合藏窮家
再拜持編復齋几

謝通判國博惠建茶

建溪春早地未暖建俗巧計催春陽茶傍萬口噪地烈
驚破芽英不得藏猶嫌旂槍已老硬獨愛烏嘴嫩未長
擷而焙之一朝就更範圭璧為圓方南州尚珍北固重
自非富貴寧預嘗浦陽賤官性怯酒素許茶味為最良
日分牒訴費齒舌口吻鎮燥喉無漿建溪奇品遠莫致

金匱要略卷之二十一
卷三
日夕夢想馳閩鄉塵埃填心渴欲死忽拜公賜喜可量
拆封碾破蒼玉片雲脚浮動甌生光愚知公賜豈徒爾
欲俾下吏蠲俗腸滌除詩冗起清思驅逐睡興窮縑緗
玉川不暇盡七椀已覺兩腋清風翔

予家畜狸花二猫一日狸者獲鼠未食而花者私
竊之以去家人不知以為鼠自花獲也因感而作

二猫詩

狸猫得鼠活未食戲局之地或前後猫欺鼠困縱不逐

豈防厥類怠其守花猫狡計伺狸怠帖耳偷銜背之走
家人莫究狸所得只見花銜鼠在口予因竊覘見本末
卻笑家人反能否主人養猫不知用謬薄狸能服花厚
花雖利鼠乃欺主竊狸之功亦花醜人間顛倒常大此
利害于猫復何有

純甫以予去歲九日赴東陽今年復趨府作菊花
問荅見遺因以戲荅

問籬菊何事秋香欠春馥淵明歲歲走征途冷落重陽

誰采劄

籬菊答自古人生有離合不得淵明泛玉觴還有子真

攜酒榼

附原唱

問籬菊誰遣金英秋始縟花枝依舊去年黃人髮不
如當日綠

籬菊答清香數日還飄颺縱使人生鬢易華猶見黃
花開幾匝

泉上人畫牡丹

芳樹不合生深堂座上似已聞生香乃知丹青逼造化
獨有真假爭毫芒枝外霏微色雨露筆跡淋漓濕繖素
遊蜂蛺蝶頻往來今日經營知汝誤蜀川趙昌妙花樹
前後無人昌獨步師今合昌成一入畫手紛紛那敢措
上人筆下如有神一掃欲空西洛春姚黃魏紫色憔悴
自覺筆假勝天真天工栽花苦榮謝畫工運巧無冬夏
天工巧極誰論價輸帛傾金只酬畫將令世俗尊造化

呼僮捲障不復掛

和樓志國范君武讀胡尉臨安所獲顏魯公書斷

碑

書名唐世凡幾人魯公運筆獨有神當年一字百金直
異代儻獲宜爾珍公嘗道直不容內江湖出走刺史輪
東南揮翰落幾郡在處巨蹟刊堅珉石堅字巨未應泐
旋復五代遺荒屯州鎮尋兵寺觀火缺碑毀碣埋泥塵
乾坤豈亦愛字寶不使久屈卒不伸脗合陰假好事手

得此斷石溪山垠苔封土蝕初莫省一洗爛若開三辰
不由名氏驗體法氣質渾厚知顏筋點端屹如泰山立
畫勁森似長戟陳寧同棗木浪傳刻少陵尤惡肥失真
蒼茫疑聞地靈泣為失此石后土貧好事得之不自有
能廣墨本遺其倫始從君武愜傳玩大句感發驚儒紳
寫公勲德無一欠何必讀史勞吾唇青衫志國繼高唱
首論書法詞逾新末言公忠死賊刃不覺憤淚霑予巾
昔人謂書乃心畫浮沉直撓皆相循公心遠可此書鑒

體不姿媚一以淳嚴嚴古氣自盤薄宜汝希烈不得臣
雖云筆力奪元化濟以忠誼重萬鈞後來忠誼弗公學
磨鉉臨帖虛終身李斯篆隸豈不好彰彰姦迹流自秦
乃知一藝不獨善所貴名節堅松筠魯公之書以名貴
歷代共寶無沉堙

送裴光世赴舉

光世出門頭懶回身將西去犯斗魁風雲自繫鵬鷁健
里道正為驂騑開憶初鄉賦選主司數州側腦聽外臺

一朝吾鄉騰薦口姓名喜得丁與裴筆搢試席動千指
匠精反愧木盡材六人既拔里中傑黑白自可消怨猜

君名稍稍近人底豈是天意激後來主司南宮頃第一

又嘗禮部預揀才

裴如晦嘗充
省闈點檢官

頗傷辭律變新進怪僻

一鼓波遂頽既而移書六人者歷數文弊有可哀且言

文章貴體要試格尤要合準裁六人既拜主司教青雲

捷路知力推方今最曰場屋公實藝可進那用媒君胸

二紀富珍蘊每向紙上揮瓊瑰掛名省壁定顯赫續取

科第仍崔嵬明年躍馬游街塵請君飲乾臨別盃

走筆送張伯起

男兒剛腸逾古鐵每到傷離猶暫折離緒不啻亂繭絲
纔攬衷腸便成結憶昨送子秋風前薄酒三行歌數闕
我歌多感酒易醺子車為我澁不發今來與子舉別觴
還是去年分臂日人生歲歲有離恨爭遣綠鬢不為雪
安得共子並翼飛四方上下無時別

臨洛驛雨中作

朔野無花春意薄，斧聲惟見桑枝落。北人是日競條桑，
手執懿筐共操作。客亭繫馬吟寒廳，細雨纏愁牢似縛。
多情北鷺能傍人，如說春心繞踈箔。故鄉桃李應滿園，
爛熳香風隨處著。十年游宦辭江湖，塵土日侵雙鬢惡。
天涯懷抱傾東南，悶對青燈舉幽酌。

丙午寒食，厚卿置酒壓沙寺，邀諸君觀梨花，獨蘇子由不至。以詩來邀席，客同作。予走筆依韻和之。
種梨易長地舊淤，春風一掃無枯株。沙頭古寺枕城角，

樓殿自與人迹踈看花置酒三月破點檢座客惟欠蘇
酒酣花底不知處恍若身世游藥珠銅臺割據古豪威
樂事已去惟邱墟直須及時結勝賞莫局官事同轅駒
林僧迎我屢前揖野鳥避客遙相呼咸陽有花遠莫見
豈若此地來須臾風前嗅雪不宜緩春芳過眼猶奔車
繁枝向月合照映亂片落地無掃除罇邊酌不復計
馬上倒載聊拊扶子由閉戶自懶出花與雙眼知何辜
天姿必欲貴純白紅杏可婢枕可奴君詩險絕不容和

梁園騁思慙相如

寒食安厚卿具酒饌邀數君子遊歷沙寺觀梨花
獨蘇子由不至詩成命座客同賦予既次韻和之
明日上巳安復置酒招予與蘇又明日請子屈二
君為射飲之會而蘇君仍用前韻作詩見及予亦
復和

花前爛醉如泥淤猶恐花過嗟空林歷沙梨開百頃雪
春晚未賞計已踈厚卿置酒赴寒食蜂喧蝶鬧人意蘇

林間把盞誰我侑鳥歌聲滑如溜珠魏都風流重行樂
艷妝麗服明郊墟我初聞招便勇往恨不揀翼附駿駒
峨眉夫子趣獨異靜坐幕府煩邀呼車公不到座寂寞
大句落紙來須臾樽邊弄筆輒強和布鼓乃敢當雷車
主人明朝復命客是日楔事修禊除日涵花氣暖不散
酒力易著起要扶清明予亦飲射圃罰解屢困辭不辜
杯盤一飽藉脫粟那有白飯餘君奴事見杜工部集梨花好在
期共醉功名身外終何如

送川僧玘上人歸雪竇

釋子羣羣蹈一轍類能恐誘鼓師說彼上人者劍外來
獨許清吟調風月就我乞詩歸甬東三叩賓階通刺謁
何時腰下解餅盃巖竇應逢先臘雪

小桃值風零落殆盡偶成鄙句奉呈諸君

小桃庭前祇一株無數花開艷新繡破藥脉脉向人笑
開枝酣酣索春鬪只見蜜蜂來往喧不道雙鷺共時候
醉吟繞花日幾遭坐卧欲來花下就東風昨夜忽顛狂

曉枝點檢不依舊惜無錦帳闊百步遮藏免被風力驟
小兒地上拾亂片猶愛殘香再三嗅桃兮開落奈汝何
却取餘杯醉春晝

近承楊子遣垂和池上短篇愛而有贈且攄子懷
楊子文格少已適自闕以西鮮此流逸興一發不言休
詩吟千篇酒百甌始謂富貴力可求行年四十差厥謀
相逢渭水初清秋氣俊秋隼辭長蚪歡然一見分輒投
往來自爾月屢周忽聞屋角鳴春鳩感時出門寫我憂

載酒興慶荒池頭半酣繫馬聊登舟紛紛涉水驚眠鷗
晚陽欲落孤煙收開元盛事空林丘流年數百如回眸
陳迹隨感來吟搜偶作短句詒同遊揚子既見遽和酬
筆落紙上不暫留詩珍玉案書銀鈎詩人乃是天地儼
造化萬物遭剗鏤天公報之甚操矛少使稱遂多窮愁
子嘗兩舉試此州病坐試席出則瘳筆力健可掣十牛
及與命鬪力弗侔翻被命屈豈自由嗟予所學淺以浮
不與造化為怨仇胡然天公亦我尤剛腸勁貌寡媚柔

觸忤貴勢在轉喉蒼顏常調祇自羞使看平步趨公侯
子來我語徒啾啾天高聽卑誠謬悠不若且默真良籌
有酒一醉春風樓

送李去病楊元老

君王赫怒超前古威令風馳奮皇武將士咸懷敵愾心
桓桓孰可當貔虎岷峨橫抹西南坤河池散關當北門
堅城高寨礙飛鳥天兵百萬方雲屯給軍自古資巴蜀
接軫連檣轉芻粟正須將漕得其人賦役平均軍食足

三分才具超常倫不獨搗藻追淵雲究宣德意可預見
抉剔姦蠹蘇疲民使星入蜀今重應芒寒色正相輝映
川合東西幾萬家佇瞻玉節交相慶行聞盡錄平戎功
給餉正與提兵同紫泥封詔看西去歸來聯騎朝王宮

賣松翁

窮山老松幹百尺縱有愛者勢難值小松聳擢未及丈
何亦冷落守巖石由來世眼習繁侈競事妖紅與爛白
徃徃破產聚名卉未見有一號松癖城中有客賣桃李

美價高下隨意得咄嗟彼叟何為者浪負松本窮九陌
行求善價吻欲燥力弛還立朱門側過之千百絕一顧
寧復肯許一錢直音聲猶帶澗風澁顏色尚染嵐煙黑
松材雖良人未見其奈桃李有春色嗟哉子計信踈矣
豈宜肩入芳菲域速培舊土養松幹待棟明堂柱帝宅
予疑叟非鬻松者無乃矯世為所特衆趨時好逞穠艷
何獨子子街斲碧羣雄馳騁尚謫詐輒以仁義游六國
時乎釋老肆分藉愈以原道破羣惑叟乎叟乎子爾知

獨行矯世難為力

與盛毅同賦暮角行

城頭滾滾寒烟起
城裏無人冷如水
一聲暮角聒地來
聲中宛轉含餘哀
逡巡流入單于調
耳邊似近單于臺
坐客未終聽對面
淚雙迸
那復將軍絕塞眠
朔風吹落玉帳邊
狼烟未盡不待曉
恨不立起銘燕然
何人始製角中曲
幽怨到今傳不足
吁嗟畫角終無情
百年日月銷此聲

冬雪行

幼年壯氣寒逾熱更喜朱顏照飛雪門前地厚堆玉塵
屐齒千回狂走折今來過壯能幾秋眼未見雪心先愁
病膚隱粟出門懶敝袍盡日紅爐頭此身知更十年後
雪屋能如今坐否層衾沒領定盡眠那復吟邊開凍口
壯齡袞袞洪濤奔百年浩蕩未易論人間萬事亦顛倒
且對今雪空清樽

送盛君方

秋風木葉飛邊檄日暮銅臺別杯醕燕姬一曲聲未終
交臂方攜忽南棹相公鎮魏從辟書玉帳三年奉談笑
密謀直道裨主人飽食庸兒或陰誚君殊不顧但自若
炯炯誠心復誰照相公還朝數論薦援手無人在廊廟
薦章未報人事改魏國門前客相弔聖賢尚覬後世知
萬事那能目前料方今擢才不待次道路紛紛走嚴召
朝廷必欲收真才豈有如君使常調讀書適用非苟知
脫略空言直趨要有餘利刃未一施可惜青萍反居鞘

誰能出力終提攜會看驚人露芒耀君如弗偶好言命
予亦徐當卜耕釣

送知府吳龍圖

國初以來治蜀者處置盡自垂崖公當時奏使便宜敕
不與天下州府同行之已及八十載姦宄銷伏誰之功
因循至此漸抗敝有未曉者時相攻鞭笞小罪亦檢察
不許略出常科中下民知之頗不懼州縣往往藏羣兇
側身斂足未動者實以累朝恩澤隆公之初來蜀人喜

慈愛久著民情通衆心歡然恥犯法拔藥浮薄歸醇醲
盡將約束付僚吏興起學校還文翁二年美化極沾洽
遠近循服如偃風上將歸公問誰代當使間作如笙鏞
遂求元老得青社其人廊廟之宗工往年鎮撫有異績
大旆再來遣于東公今與之合符去到必奉詔參夔龍
大資舊德固無慮剖判自出其心胸所憂厥後嗣之者
忠定良法還如空養頑活狡作淵藪不免剪殄煩興戎
蒙之憤懣久填臆言賤不得通九重頌公上殿起居罷

第一用此聞宸聰

京師逢徐良溫叟明府

弱冠相逢今四十當年壯氣虬龍蟄交情獨在酒琖深
人事細論衣袖濕詩書誤身浪自憐公獨滿眼誰可揖
蒼顏已變長安風後會更應尤戢戢

小疾中元恕相別往長安信筆成篇奉送

一春三月少見晴濕雲不飛壓花老君來別我西出關
病裏傷離似翁媪和風吹面纔幾程即入風流洛陽道

司農水利無留行洛城花開為誰好漢唐陳跡到可尋
猶有山川豁懷抱憶昨行春從魏公興慶池邊玉樽倒
公今已為泉下游往事憑君問煙草官家諸路急使才
歸對明光切須早

題可久上人房素屏

雕軒畫室吳僧居花草禽魚屏面集豈如蕭爽大士堂
雪山數尺平頭立滿齋虛白已自生隔坐紛華不容入
霜毫一掃都無痕獨有淋漓粉光濕好丹世上空絃絃

趣與師同百無十常時吟客惟我來共愛此屏微靜翁
日晴難駐手試捫指下瑠璃無寸澁願乘醉筆留幾行
為寫高僧白雲什

送王賓玉

相如昔乘使者車縣令負弩當前驅頗矜意氣誇里閭
檄詞爛熳肆欺誣歸來不說民飢懼餘佞更留封禪書
江山清絕冠天區豈甘久被斯人汙邇來炳靈軼古初
者俊相繼馳亨衢堂堂御史今名儒志節慷慨忠義俱


才高識遠器有餘不似文園淺丈夫一朝持節歸成都
使星皎皎臨坤隅輟從憲府恩意殊霜威鷄擊正所須
姦胥所在察于茶文券計斤良可吁鋤凶芟穢忌跼蹶
元惡須行七日誅惡除惠澤益霑濡頓使枯瘠都豐腴
坐茵未暖羶毼能詔歸還直承明廬朝廷急賢恢遠圖
碧雞金馬不用渠以人報國功難踰諸生中有何武無

謝三門提舉輦運宋叔達郎中寄古碑雜言

長安古名都漢唐以來帝王宅當時高冠大帶接跡公

卿間聲名大半文章伯能書萬變軼出意象外那跼體
法就常格傑詞精翰在處勒琬琰從此闕西富碑石咸
陽原頭螭蟠龜負不知數風雨皴剝塵土蝕荒郊壞宇
大者臥榛莽小者老祠佛廟往往龕屋壁憶初來長安
于此心頗溺朝披夕購自忘倦一紙不吝百金易豈惟
讀辭玩點畫漢唐往事皆歷歷始者累一以至百今既
累百至千未免廣搜覓古人載書兼兩懼猜謗今我車
載不足更囊積中郎知我有碑癖封寄數本跨數驛中

郎中郎雖欲遂愚癖愚也字學不進文格不長翻愧嗜
此苦無益雖然古人亦或有所嗜又恐一朝捨此愚意
無以適碑乎誓將蓄汝永吾好不已聖猶賢博奕



祠部集卷三

欽定四庫全書

集部

祠部集卷

四至
六

詳校官庶吉士臣朱理

檢討臣何思鈞覆勘

總校官編修臣朱鈺

校對官庶吉士臣王朝梧

謄錄監生臣曹壽

欽定四庫全書

詞部集卷四

宋 強至 撰

五言律詩

李花

地暖春纔半
蹊深氣已暄
風光何處好
雪浪此時翻
勻似金刀翦
裝成玉杖繁
天桃漫相壓
吏部竟誰言

曉鐘

縹緲驚春夢，鏗轟送晚聲。
烟出野寺，催月下山城。
牕映東方白，燈留半壁明。
隱然餘韻在，羣動已營營。

閏月晦日

乾坤一傳舍，日月兩征輪。
邂逅逢餘閏，連綿送晚春。
巢邊迎燕熟，枝上數花頻。
漸暖茅簷日，吾將理葛巾。

落花

林間花自飛，物理不應悲。
偶對飄殘地，休論艷發時。
有情香水面，無數點河湄。
蜂蝶含餘意，徘徊繞舊枝。

因訪楊公濟遂同步野夫家省其母野夫時就試南宮

馬繫揚雄宅門過孟母隣升堂予獨拜

予拜其母

同井子兼

親公濟所居與之密通

萬卷先生富千金舊產貧早將安穩字去

慰杏園春

同楊公濟賦破山得開字

無物終天地青山豈免開萬人鏡秀骨一氣失全胚漫貯崇朝雨猶防浩劫灰何年巨靈手曾此擘崔嵬

同楊公濟賦晚過西村

空影倒波面晚陽留樹梢人煙青近郭鳥道暗長郊世
外空搔首溪邊懶結茅滄浪那敢羨漁父定吾嘲

苦雨

雨脚灑不斷魚龍沸巨溟浮泥溢平地暴水入中庭門
巷絕尋訪壺觴誰醉醒頑雲速收斂渴欲覩天晴

螢

幸藉炎蒸力因遷腐草蹤清宵能自照暗室肯相容雨
巷幽光晦風簾亂點重臨書方汝賴惟恐有鳴螢

種藥

百藥吾誰辨農皇舊有經
傾金購善種按譜驗真形
易地防根瘦他時欲劑靈
天時縱不雨灌溉賴園丁

贈於潛張定國

蕭散前川令才高氣亦剛
學攻諸子短能涉衆人長
日月銷書卷功名撫劔鋌
他年有大用莫漫比柴桑

某近與和叔游景愛之不足因吟短篇以贈

夫子南州傑相逢出肺肝
平生潛聖聞壯歲尚儒冠
鵠

鷗霄垠擊蛟龍井底蟠恥將孤憤劍容易向人彈

贈李熊先輩

昔萃閩人秀夫君得最完文章醇不雜氣質渾無利場
屋間新詔鄉閭正素冠天應老賢業頭角壯年蟠
詔書一日至多士競軒眉獨有儒林傑方纏風樹悲飢
腸惟飽學正口絕柔辭從古器大者於中成就遲

與王仲密諸君泛湖

十月清霜後孤舟顛氣間酒邊頰白日棹底倒青山境

勝歡憂泯吟頻物象慳吾儕一笑後魚鳥伴誰閒

急棹趨吳門

寒日山尖落孤烟樹杪屯水流天欲動舟急岸如奔縹
緲穿雲角蒼茫望郭門片心爭宿鳥去去近黃昏

初入汴

山勢隨淮斷河流帶地渾巖風踈樹影落日露沙痕客
興雙蓬鬢吟懷一酒尊舟行那敢緩霜意滿乾坤

新鶯

未見攀花宿纔聞隔葉歌可憐毛羽細莫恠語言多匹
馬春風路輕舟夜月波數聲來入耳最奈客愁何

穀下春日

楊柳長安陌游車錦繡香漫傾春日酒誤入少年場意
氣青雲客風流白面郎致身愁獨晚檢點鬢毛蒼

寒食前二日對雨

紅濕花枝軟青涵柳色鮮未開新禁火自起欲晴煙坐
卧銷佳節招尋憶舊年故鄉游樂地心折泛湖船

對雨寄楊公濟

江海歲云晏，雨冥風自淒。
葉光羣木洗，翅濕幾禽低。
靜榻欹寒枕，孤城隱暮輦。
少陵車馬客，催踏草堂泥。

雨中呈丁評事

騷雅丁夫子，年來客路岐。
故闌春夢後，獨館雨留時。
詩有龜兒掌，游須驥子隨。
令嗣君家千歲鶴，應解念歸遲。

歸鳥

日落群山靜，天寒獨鳥歸。
聲悲故巢遠，影入片雲微。
踪

跡憐吾滯青冥羨汝飛莫為雙翼誤須避暗中機

宿慧安院

積淖厭行路解鞍欣曲肱疾風穿敞屋細雨濕青燈
夜有饑鼠觀空無定僧中宵塵累息山水思填膺

九日病中泊舟召伯堰

采采南山菊還應滿故園

予之小園實占南山

全家泊孤埭多病

負清樽木末秋聲老天涯雨氣昏鄉闌吟望外愁淚有

雙痕

某為府曹伏蒙吳先生以詩見寄謹依韻奉酬
瘦馬風埃裏蕭疎分亦安閒趨京兆尹冷甚廣文官錦
繡頌詩句松筠映歲寒天邊師坐澗南望祇長歎

同盛任道賦暮陰

得寒字

野館臨空澗江城起暮寒年光去天末雪意上雲端自
失歸禽影能侵病客肝莫將愁對景入夜轉漫漫

次韻禮之齋中述懷

僻坐治孤學取書窺古人高風凜如在千載邈相親欲

滿詩書腹寧規富貴身獨君知己厚無亦慮吾貧

春雨一篇呈純甫賢僚縣庠諸彥

漠漠陰常結垂垂勢未收
潤多宜土脉落久驗溪流
與物知無間於花似有讎
少年車馬客惆悵為君游

二月大寒偶書短句

上天誰與問四序曷相干
已季春成暮當溫氣反寒農
心憂地凍俗眼惜花殘
我豈殊民意身為父母官

經春罕嘗見花今出湖上悉已離披

飛花何太急春在豈須忙亂點不經眼殘枝猶斷腸愁
看湖色淨怯照鬢毛霜回首壯遊地幽襟付淺觴

山中遇雨

馬上涼秋雨隨愁入亂山垂垂衣袖重點點鬢毛斑
綠鳥寒聲外漁樵古畫間片時全嶺暗急趁暮鐘還

純甫小池生雙蓮

造化有詭異雙渠共萼翻凌波洛神艷泣竹舜妃魂得
所雖欣地猶孤尚笑根聖朝不言瑞圖厭恨無門

和純甫獨往至德上方避暑

敝屋數楹隘炎曦一線長
梅仙厭煩溽蕭寺得清涼
山鳥聒幽耳澗泉蠲渴腸
茲遊君獨勝河朔浪飛觴

通判國博惠建茶且有對啜之戲因以奉謝

數餅建溪春求逾尺璧珍
封從鄉國遠惠與郡僚均
午榻忘搯臂晨觴厭啟唇
拜嘉當對啜相待况如賓

書窓

一室微吟地開牕更欲虛
入雲驚紙破照月愛樵疎
野

色連朝夕秋光滿
佳廬何如謝太守
遠岫獨相於

寄題張殿直長春亭

甲第俯河湟
修亭面勢宜
琴樽長有樂
草木似無衰
境勝青山敵
心閒白日遲
祖良迷大隱
獨與赤松期

寄題郭明府寺丞潁上西齋

退策謀何早
閑居興頗濃
渠流通潁派
窓列隔淮峯
玉麈談賓盛
牙籤載籍重
雨中時墊角
一代慕林宗

奉答雅均途中見寄二首

金史曰人合三
卷四
濁流非猛激無以頓澄明此邑先膏潤今予力潔清人
皆疑矯行君獨照真誠一得途中什說說衆口平

貧固誠吾分廉斯亦士常漫多愚執守媿少予文章

雅均

前篇頗憐予廉貧復
有論文有力之句

雖幸相逢近猶嗟此別長何時却

南轡重把論詩觴

觀棋

鬪智不鬪力一枰思解圍防人甚勅敵平地有危機蝸
角爭先後狼心競是非傍觀縮手者往往見精微

九日過後漫題堂前雙菊

花日金相照，條風翠競翻。
誰言羞晚艷，自喜勝孤根。
客土深培力，家人一溉恩。
秋香真好在，未易負清樽。

和純甫紅葉

秋園無艷色，特地起西風。
間向煙林翠，時呈霜片紅。
霞光青漢襯，燈炬碧紗籠。
不解隨松柏，染裁煩化工。

再次韻和純甫紅葉之什

徒密嗤翠幄，有文殊紫屏。
因霜變顏色，點樹作丹青。
廢

苑掃還聚踈林生易形秋風無別艷祝爾莫飄零

擬山道中早行有感

晨興事行役寸祿此時輕撲面風霜緊隔林鷄犬鳴遙
天分淡色殘月露微明便欲投簪去無田可力耕

山驛孤燈盡霜天片月低還家人自喜戀樵馬頻嘶野
水分微白巢禽驚穩棲前村應曙色依約數聲雞

宿山寺

蒼莽窮山路蕭森古寺門夢深宵殿月淚迸曉枝猿人

事隨羣動山情阻細論城中塵沒眼愁思滿歸軒

某承乏東陽周親惠然顧訪未幾告別以詩餞之
親戚富貴合賤貧宜見踈獨君從遠道為我在高車相
得未逾月薄言還故廬風霜正淒暮臨別尚躊躇

晚登至德上方偶書短篇呈山主雲公

城市隔半舍

院距邑十五里

好山寧在深亂雲歸別塢落日照

踈林能解外緣縛始堅安住心冠裳方我誘漫作愛山

吟

離東坡後寄題義師上方

山水東陽富僧居更翠微晴峰露秋骨古樹減煙圍啼
鳥遠相應孤峰閑自歸予生秉幽尚夢想在禪扉

劉叔茂及第後往廣德拜親過吳江新治

今歲同升客如君有幾人青年登一第白首具雙親喜
氣生軍壘懼迎聚邑民諸兄在天祿勉去繼清塵

惠山泉

封寄晉陵船東南第一泉出瓶雲液碎落鼎月波圓正

味云誰別繁聲祇自憐要須茶品對合煮建溪先

官滿將見舍弟

三歲別吾弟今歸心始降從茲得安寢無夢過重江預
驗鵲音喜行看雁影雙西湖猶可泛酤酒市羊羜

途中寄純甫

諸友分攜地重陽欲近天共誰寥菊蕊獨立憶梅仙對
飲乖今日傷離似去年佳山足吟賞應自有新篇

志遠法師挽辭

寂寞湖邊寺荆溪目已暝
窻雲猶曉白竹徑自寒青
野鳥悲吟動門人感涕零
里無梁補闕誰可法師銘

庚子歲除輦下作

呼兒來秉燭點檢鬢邊絲
志在驚時晚年加願曉
逢京華猶旅食世態益吾悲
四十明朝是愁吟杜子詩

久雨見月

千門却燈燭久雨愛冰輪
愁眼開今夕清光對故人
更長頻側帽望極反露巾
幾為浮雲掩行藏類此身

立春

宿凍歸何處池塘漲暖波日盤花面水風入鳥聲和俎
菜堆生葉閨裳剪薄羅獨憐詩酒興早較昨宵多

依韻和粹中早春

寒威猶壓曉淑氣已回春不道朱顏舊剛憐華歲新震
雷將出地蟄戶莫存身漸報鶯花信眉頭日漸伸

早春寄擇之

北陸寒威盡東郊晝景添風和引禽唼水暖出魚潛草

木回生意乾坤待澤漸寧知巖谷下經歲嘆才淹

正月三日郊外馬上作

長日牽人事新年散馬蹄和風吹凍柳殘雪點春泥意
愜境自勝興來杯屢攜徘徊羨飛鳥曉逐野雲低

禁烟節同子玉徐先生野步

繫馬道邊樹杖藜坡外岡風來花自笑露過草猶香樂
事論三月吟懷驚八荒時平那有感雙淚肯浪浪

春色

淺深花面染來去柳邊浮雨氣那能洗年光亦共流濃
濃交野綠拂拂上朱樓轉恐紛華眼蕭條不愛秋

題劉有方御藥翠巖亭

購石黃金費開軒翠玉叢端居憐象魏遠意自衡蒿花
弄疎簾日禽呼靜榻風移山寧有術未易笑愚公

升之元真觀讀書

白日無停運青雲要早圖寓居隣上士述作笑潛夫案
冗書籤滿窻明樹影孤徘徊拂塵壁一半舊題無

送李厚秘校赴相州戶曹

迎婦金貂宅之官銅雀臺俱新是婚宦有素獨憐才薄
領時能撥圖書日可開無勞歎州縣自足脫塵埃

醉卧

彭澤終朝飲杯乾入醉鄉眩頭遺野憤坦腹委藜床吏
部甕邊卧山公馬上狂何如此安穩寢興為吾長

和叔以琴詩見貽因成一篇奉答

製就七絃器斲殘千古桐正聲希世出羣耳此時聾

暗列星隱意存流水空憑君莫輕撫留取和薰風

古劍

只因耕戰地得此古龍泉磨拭自今日埋藏曾幾年無
將試蛟窟宜待靜狼烟寄語姦邪輩當鋒莫向前

壓書玉兔

白玉雙蹲兔工深刻楮勞長疑奔月窟渾欲動霜毛似
喜書成穴猶驚筆有毫案間誰汝待自覺守株高

睢陽春日偶書二首

凍柳輕能舞枯河暖亦流東風應自好遠客獨含愁攬
鏡傷吟鬢無錢買釣舟誰能終日興大半在滄洲

楊柳亡隋岸風塵舊宋州寄家盈百指憶第濕雙眸旅
宦那能定人生本自浮旋酤街北酒準擬送春愁

睢陽別包進甫

飲徧長安酒春風送馬蹄異鄉憐會合明日復東西行
興看君速歸期恨我稽門前客星瀨到日濯塵泥

別希魯回馬上口占

兄佐諸侯幕愚居孝子廬奔馳他自得情味獨相於先
送秋帆動還嗟友席虛平生感知淚今日為連如

大風

正月明朝盡東風半夜狂乾坤搖蓋軸草樹拔毫芒亂
瓦飄無數寒沙走更忙聖時讒口絕天令莫乖常

寄盛子美俞元功二先輩

二君得第後守選
寓相國寺習試法

彼美吳州傑相從蕭寺居聊窮三尺律肯恃五車書前
有殊尤等行當選擢初秋風吹客袂鄉思復何如

試法
新立

寄公立

一朝揮別袂九日在征岐
識我相思意如君獨坐時
榴花須滿瓊菊蕊况盈枝
目下重陽淚宜看杜牧詩

寄俞君度

夫子憊已甚平生心向存
黃金空舊產白首寄他門
獨酌醉應淺愁吟聲更吞
飄零那復久知已有平原

員外
陸先

過洛州

朔野風煙古
臨洛氣象存
魏風沿土性
漳水抱城根
故壘盤荒草
殘碑落近村
太平民產富
桑柘半郊原

祠部集卷四